



السلام عليكم ورحمة الله، كيف حالكم يا
شباب عاملين إيه؟ تمام منورين، الصوت
واضح؟ أخباركم إيه؟ مية مية؟

الله يبارك فيكم يا رب ويرضى عنكم، كويس،
عاملين إيه بتراجعوا أصول الإيمان؟ مين
براجع أصول الإيمان ومستعد للامتحان؟

في مفاجآت في الامتحان دوت هنعملوا هدايا،
هدايا للناس اللي هتخش الامتحان أنتم
عارفين إن احنا بنحب نعملكم هدايا صدقات

جارية بقى وشغل جامد يعني ده السؤال
الأولاني، السؤال الثاني عن دورة الداء
والدواء أخبارها إيه معاكم؟

الدواء الدواء ده فاضل فيها درس واحد فقط
هينزل يوم الجمعة القادمة هنقعد نعط بقى كلنا
في آخر الدرس دوت، هنعط فعلا، كان يوم
صعب يوم ما سجلت الدرس دوت، ربنا يا
رب يعوضنا وإن شاء الله هعوضكم بدورة
مذهلة إن شاء الله انتظروا المفاجآت القريبة،
انتظروا دورات أقوى من الداء والدواء ومن
أصول إيمان وبعد الكهف فيه مفاجأة برضو
إن شاء الله، المهم أنتم تكونوا جاهزين
ومستعدين، طيب ما شاء الله عليكم ربنا يبارك
فيكم يا رب ويرضى عنكم، اه الداء والدواء
دي صعبانة عليا والله مش عارف خلصت

إزاي؟ مش مصدق نفسي والله، طيب يلا
بسرعة بصوا قبل ما ابدأ بقى بيعملوا شير
للايف بسرعة جدا ومنشن منشن منشن منشن
كل المنشنات اللي عندكم في الحياة وشير بقى
عشان النهاردة هنتكلم عن موضوع مفيد قوي
يعني، يلا نبدأ مستعدين؟ بسرعة منشن وشير
بسرعة، ماشي يلا بينا

**بسم الله الحمد لله وأشهد أن لا إله إلا الله
وحده لا شريك له، وأشهد أن محمداً ورسوله
صلى الله عليه وسلم ، أما بعد.....**

أهلاً ومرحباً بكم في لايف جديد ولقاء طيب
بإذن الله تعالى، النهاردة سميننا اللايف إيه؟
سمينا اللايف "**لا أبرح حتى أبلغ**" وهذه الكلمة
العظيمة اللي قالها موسى عليه السلام لما كان
بيستعد لرحلة إلى مجمع البحرين للقاء الخضر

فقال: " لا أَبْرَحُ حَتَّى أَبْلُغَ مَجْمَعَ الْبَحْرَيْنِ "،
مجمع البحرين ده المكان اللي هيقابل فيه
الخضر عليه السلام "أَوْ أَمْضِيَ حُقُبًا"

[الكهف: من الآية 60]

يعني ممكن أقعد سنين طويلة أسافر بس المهم
أوصل في النهاية للخضر لأتعلم منه هذا العلم
اللي ربنا قال إن هو مش عندك وعند
الخضر، النهاردة حطينا العنوان ده خليه كده
لوحده "لا أبرح حتى أبلغ" والهدف منه
النهاردة إن أنا جاي اتكلم في مستوى ثاني بقى
يعني ركزوا معي كده عشان تفهموا أنا جاي
اتكلم في إيه النهاردة، طيب وقولولي
الموضوع ده فعلاً إحنا محتاجينه ولا لا تمام،
دلوقتي إحنا بنلاحظ إن أغلب خطاباتنا
الدعوية ومثلاً

الدعاة لما يبيجوا يتكلموا مع الشباب زيكم
والبنات زيكم دايمًا الخطاب الدعوي بنحس إن
هو_طبَعًا ده مطلوب_بس الموضوع زاد
بمعنى إن احنا أغلب خطاباتنا الدعوية اللي
هي بنتحايل عليكم عشان يعني بالله عليك يعني
إيه ابدأ بس، ما تصلي ركعتين بالليل، يعني
البسي حجاب أي حاجة وخلص بس المهم
اتحجبي، احفظ آيتين في اليوم، عارفين
المستوى الدعوي ده، ده مطلوب يعني أكيد فيه
ناس بالنسبة لها صعب إن أنا اكلمهم أكثر من
كده يعني، وفي ناس بنبقى يعني يا رب يبدأ
يصلي، بس بحس بقى إن احنا من كتر ما إحنا
بنتكلم في الميديا والميديا للأسف أنا مش
شايف أنا بكلم مين، يعني أنا معرفش دلوقتي
ورا الشاشة مين قاعد؟ يا ترى اللي قاعد ورا

الشاشة واللي قاعدة ديه هل هي واحدة متقدمة
مثلاً وهي عندها همة فعلاً عندها همة عالية
فعلاً وممكن تبقى حاجة كبيرة وكنت أنا بسبب
الخطاب الدعوي ده مخليها دائماً في حته رايقة
كده وهي أصلاً الحتة دي بالنسبة لها سهلة
فبالنسبة لها أصلاً ما أنت كده يعني تمام أنت
كده ريحتني أصلاً، ده أنا عندي همة أعلى من
كده بس أنا كل الشيوخ وكل الدعاة طول
النهار قاعدين يقولوا يدوبك ما تصلي ركعتين
بالليل يا عم، صوم يوم في الشهر، ما تقرأك
يعني صفحة القرآن في اليوم، فبحس إن أحياناً
إن إحنا لا مش معقول بقى يعني مش معقول
هنفضل طول حياتنا نتكلم بمستوى الخطاب
الدعوي ده اللي هو يعني اتحجبي أي حجاب
وخلاص، يعني ده الحمد لله ده أنت لو غطيتي

شعرك ببقى كويس، ماشي ما إحنا قولنا أكيد
في فئة يعني بقعد أنا يعني بقول يا رب يبدأ
بس، بس أنا دلوقتي أنا متأكد إن وراء
الشاشات دلوقتي وأنتم هتقولوا لي أنتم ولا لا
يعني لو مش موجودين قولوا لي نقفل اللايف
وأروح، بس هل ورا الشاشة دلوقتي قاعدين
ورا الشاشة فعلا حاسين أحياناً الخطاب
الدعوي ده لأ أنا مش عايزة كده؟ أنا عايزة
أكثر من كده شوية، يا جماعة يعني راعوا إن
في مستوى من الناس عايزين يبقوا أحسن من
كده، ليه دائماً بتعاملونا يعني أقصى أحلامكم
فيينا إن إحنا نبدأ؟

يعني ليه دائماً كدعاة يعني ليه شايفينا دائماً
مفيش كده يعني إحنا لو بدأنا ببقى كويس
وخلص وبتسيبونا في الحثة اللي في الأول

دي ومحدث بيدينا حماس إن إحنا نعلي أوي،
ليه؟

لا في الجمهور ده موجود، موجود ومستتني
وعايز حد يقوله عايز حد يشجعه، أنا عايز في
واحدة بتتكلم أنا لابسَة خمار أصلاً يعني إحنا
معلش مع احتراممي لما عملنا الدعوة اللي هي
الأخيرة ديه حملة "البسيه صح" على سبيل
المثال طيب إحنا لما عملنا الحملة ديه اكتشفنا
إن مثلاً في الجروب أنتم عارفين البنات طبعاً
متابعين الحملة دي جروب دلوقتي حوالي
خمسِين ألف واحدة اللي إحنا عاملينه على
التأجيرام حلو فعملنا كده اكتشفنا إن أغلب اللي
هم أصلاً معاننا في الجروب هم محجبات بل
في جزء كبير منهم بخمار وفي جزء كبير
منهم بنقاب، طب أنت داخلة تعملي إيه؟ هي

داخلة عايزة أعلى من كده، فتخيل أنا مثلاً
قاعد طول الحملة بتكلم إيه يا رب تتحجب
طب ما أصلاً نص اللي قاعدين معاك في
الحملة اللي اكتشفناه تمام إن أغلب اللي
قاعدين معانا في الحملة ما بين خمار ونقاب،
طب هي داخلة تعمل إيه؟ هي جاية معانا تعمل
إيه؟ هي جاية بتقول يا جماعة أنا نفسي أعلى
والله، طب أنت بنقاب أنت جاية تعملي إيه؟
هي جاية تقول أنا نفسي أعلى، عايزة صحبة،
يمكن عايزة نقاب أعلى، عايزة تلبس تستر
أكثر، عايزة توسع عايزة تبطل تحط مش
عارف إيه عايزة هي عارفة إن في أحسن من
كده، فهي داخلة تقول أنا عايزة أحسن، طب
أنا دلوقتي لو أنا أصلاً بتكلم طول الوقت مثلاً
في حملة زي ديه كمثال أصلاً الحملة ديه

هدفها أنتم عارفين إن كان هدفها إن إحنا عايزين أحسن، عشان كده أنا مكنتش بكلم فيها فئة معينة بقول يا جماعة اللي مش محجبة عايزنها تتحجب، اللي لابسة حجاب طب ما تلبسي خمار، اللي لابسة خمار طب ما تلبسي نقاب، اللي لابسة نقاب طب ما نشوف المخالقات اللي في النقاب علشان نصححه ونطلع بحاجة أحسن، اكتشفت إن في مهمة عالية جدًا يعني في بنات أصلًا داخلين في المناقشات اللي بنلاقيها في الجروب أكيد أنتم معانا في الجروب وشايفين لا المناقشات بتتكلم في مستوى ثاني، البنات بيتناقشوا جوه أنا اتفاجئت، أنا افكرت مثلاً هلاقي ناس أقصى أحلامها تلبس خمار! لا البنات جوه المناقشات بتتكلم في شيخ الجوانتي؟ يعني طب فتحة

العين؟ طب شيخ بالنسبة للألوان؟ الناس
بتتكلم لا أنا معايا جمهور عايز يبقى أعلى،
طب أنا ليه بتكلم دايمًا في الحثة العادية ديه؟
ليه مطلعش بيكم طلعة معلى حتى لو أنت لسه
طبعًا أنا النهاردة مش جاي اتكلم في حجاب
ونقاب بس أنا بتكلم النهاردة بسأل دلوقتي
سؤال وأنتم جاوبوني عليه هل أنتم حاسين
فعلا إن أنتم مفتقدين الخطاب دوت؟ اللي هو
أنا آسف يعني أنا عايز خطاب يتكى عليا
شوية، عايز خطاب

لا قلّي أكثر من كده أنا مستعد أكثر من كده،
ليه أنت دايمًا بتطبطب علينا؟

لا متطبطبش علينا يعني في كده، معلى أنا
آسف بس أنا متأكد يعني أنتم قولولي أنتم
موجودين ولا لا؟ يعني ورا الشاشة في حد

عايز إن احنا فعلا نطلع نعلی شوية وفعلا
عايز أبلغ، أنا لیه دایما أنتم فرحانین لیه؟ أنت
فی أول الطريق؟ لیه أنت مش معایا لیه مش
بتتکي علیا؟ لا اتکي علیا، لا زعقلی بقی، لا
ما تطبطبش علیا، أنا عايز أوصل عايز أعلى
من کده، أنتم لیه دایما بتعاملونا یعنی لا فی
ناس عايزة تعلی، وفی ناس وحشین ولا
عایزین یوصلوا وعاوزین یعلو مش هقولک
مثلا أنا جایب واحد فی نص الطريق لا فعلا
مدخلش الطريق بیقولک لأ أنا مش عايز أخشه
بس أنا عايز هاتلی اتکي علیا یعنی کلمني
بخطاب عالی شوية ووصلني لمستوی أعلى
شوية، لأ أنا عايزة أعلى، أنت متقولیش
اتحجبي وخلص أنا مستعد ألبس نقاب علی
فكرة ومعنديش مانع وأهلي مش مانعین بس

شجعتني، أنا مش عايزك تقولي صلي العشاء
أنا بصلي العشاء متقولي قيام الليل، متكلمني
في القيام أبو ساعة أو ساعتين، أنت ليه دايمًا
فرحان إن أنا صليت ركعتين بالليل؟! ما أنا
عايزين نعلّي شوية لأن احنا الفتن جامدة، ما
أنا لو ما الفتن بتعلّي هو ليه الفتن بتعلّي لو أنا
مش بعلّي؟ أنا آسف يعني معلش احنا مستوى
عبادتنا دلوقتي مبقاش يوازي الفتن، أنا آسف
معلش دلوقتي اللي بيصلي بس الفروض
ونوافل بسيطة بقى بيعاني، اللي دلوقتي يا
دوب مش مرتبط يعني اللي يدوبك علاقته
بالقرآن قراءة سطحية بدون علاقة

حقيقية وتدبر بيعاني، الفتن داخله برجليها
الشمال داخله ما بتسميش، والفتن بتعلّي كل
يوم بتعلّي علو شديد، وأنا واقف وأنا الدنيا

معايا واقفة في الأول ومفيش حد بيقولي يلا
بيننا نكمل والدنيا عليت عليا، معلىش أنا متأكد
إن أغلب اللي بيسمعني ما هو مين اللي قاعد
قدامي دلوقتي؟ اللي قاعد قدامي أغلبهم
كويسين، أنتم كلكم أغلبكم بيصلي وبيصوم
وأغلبكم محجبات بغض النظر الحجاب عامل
إزاي، بس أنا هسألكم سؤال وتجاوبوني معلىش
أنتم بتصلوا وبتصوموا ولا بسين حجاب ما بين
حجاب وخمار ويمكن في منقبات قاعدين..
دلوقتي الفتن ماثرة فيكم ولا مش ماثرة؟
حاسين إن أنتم احنا بنعاني في الزمن ده ولا
مش بنعاني؟ طب يبقى إيه الحل؟ يبقى الحل
إن أنا نفسي لازم أعلى ولازم حد يعلي معايا
لأن الموضوع بقى أنا بطلع برة بخش على
انت بشوف الفتن بشوف الشبهات بشوف

الشهوات اللي حواليا لأ دي مستوى التزامي
أصلاً! أنا دلوقتي رغم إن أنا عندي درجة من
الالتزام إلا إن أنا دلوقتي بحس إن أنا بقاوم
مقاومة شديدة مكنتش بقاومها زمان، فالفتن
بتعلى أنا مش بعلى ليه بقى؟

الفتن بتعلى يا حضرة الدعاة ليه مش بتعلونا
معاكم؟ علونا شوية عشان احنا يعني حتى
تلاقىكم مثلاً أنتم بتقولوا أنا فعلاً الدورات اللي
بخشها ديت والله العظيم فارقة معاً كثير جداً،
تخيل بقى إن أنت أصلاً واحدة أصلاً كانت
بتصلي مثلاً بتصوم لابسة حجاب مش وحش
وبتقولك أنت الدورة دي أنقذتني، أنقذتك منين
ما أنت كنت كويسة! لا ما هو أصلاً مبقاش
الموضوع ده مبقاش كفاية أنتم لازم تعلوا معنا
الدين يا أعلى، في ناس مثلاً تقول يعني أنا

اسف أنا استغفر الله مش بزكي نفسي ولا
حاجة_ بس في ناس بتقول يا بشمهندس علاء
أنا بحب إن أنت في دوراتك بتتعمق وبتتكي
علينا وبتقول للي جوانا وبتقولنا الحقيقة ومش
بتطبطب وبتواجهنا بنفسنا عشان كان لازم
كده، مش هينفع نضحك على نفسنا احنا بنقع
فعلا ميغركش المناظر، فكان لازم حد يعطينا،
احنا بنتكلم في الكهف مثلا بكلمك فوق قوي،
بكلمك في مستوى ثاني من التدبر، بكلمك إن
أنت بقى اطلع بص للعالم من فوق، بكلمك في
الدواء والدواء في عمق عمق نفسك،
عشان أقولك أنت لازم تفهم الحاجات ديت
ولازم نطلع مع بعض ولازم نوصل لمستوى
ابن القيم ده دماغ ابن القيم بيتكلم في إيه؟ ابن
القيم بيكلمك أنت مش بس بطبطب عليك اللي

هو يلا بينا نطلع؛ ابن القيم بيتكلم فوق يطلع
للقلب السليم ده اللي عايز أوصله

فهى الفكرة فى كده إن أنا بتكلم لا أبرح حتى
أبلغ ما هو أنت لو ما بلغت الشيطان هيجيبك
وراء، فلذلك احنا محتاجين إن احنا لحماية
نفسنا، خذ بالك إن أنا لما بعلي أنا مش بتكلم
إن أنا بعلي عشان بي أعلى عند ربنا لا..
الموضوع بقى مبقاش دلوقتى كده أنا بقيت
دلوقتى بعلي عشان أفضل واقف، تانى أنا
دلوقتى مش بعلي عشان أعلى عند ربنا_ وإن
كان ده هدف طبعاً_ ده بقيت بعلي عشان
أفضل واقف فهتموا الجملة دي ولا ما
فهمتوهاش؟

الموجة بتعلى وأنا لسه زي ما أنا الموجة
هتاخذني، ما أنا لو مش بعلى مع علو الموجة
هغرق، فاحنا لازم حد يقولنا نعلى، عشان كده
لما اتكلمنا حتى في الحملة دية بردو أنا
بضرب بها مثال يعني مش قصدي إن هو ده
الدين كله بس لما اتكلمنا في الحملة ديت احنا
بنتكلم فعلا يا بنات والله العظيم عشان إنتِ
تثبتي؛ مش عشان أنا بقولك بقى يلا بنا نطلع
للنقاب ما تيجي نتشجع نخش على النقاب
عشان نزداد في الدرجات والحسنات، لا
معلش أنا اسف بس دلوقتي البنات معرضين
لكمية ضغوطات وكمية شبهات وكمية شهوات
وكمية فتن من بنات قبل الولاد المحوطين
عليهم لا أنتِ بتحمي نفسك أنتِ بس عشان
أفضل ثابتة في المجتمع اللي احنا فيه دوت،

لازم نعلی لازم فکرة تطلعي من حنة الحكم الشرعي، يعني بمعنی إيه متجيش دلوقتي تسأليني هو النقاب فرض ولا سنة ده مش موضوع اللي أنا جاي اكلمك فيه، محنا عارفين المسألة فيها خلاف والخلاف مش هيخلص والموضوع مش بس أنا مش بتكلم في كده؛ هو احنا لو دماغنا في الدين هو فرض ولا مستحب احنا هنخسر كثير قوي؛ طب ما هو صيام عاشوراء مستحب بتصومي ليه؟ طب ما صيام يوم عرفة مستحب بتصومي ليه؟ طب ما قيام الليل مستحب بتصلي ليه؟ طب ما قراءة القرآن مستحبة بتقریه ليه؟ طب ما حضور الدورات مستحب بتحضرها ليه؟ عشان احنا محتاجين كده، عشان أنا هقع لو معملتش كده فما

تكلّمـيش دلوقتـي مبقاش دلوقتـي في الزمن ده
احنا مينفعش السؤال دوت، مينفعش تقولي لا
ما هو ده مستحب مش لازم اعمله، لا لازم
تعمله! مش قصدي واجب؛ لكن هقولك كلمة
من كلام السلف توجعك؛ أحد السلف كان
بيقول كلمة جامدة، كان بيقول كانت عارفين
كلمة مستحب بتتسمى أحياناً نافلة، يعني إيه
نافلة في اللغة؟ نافلة في اللغة يعني زيادة،
فبيقول: "كانت السنن فيمن كان قبلنا تسمى
نوافل ولكن في زماننا صارت كالفرائض"
تاني بيقول كانت السنن فيمن كان قبلنا نوافل
يعني كانوا بيزيدوا بها، وأما في زماننا فينبغي
أن تسمى فرائض، عايز يقول إن زمان كان
الناس بيعملوا الفرض صح وكانوا واقفين على
أرض صلبة فكان بالنسبة له النوافل بيزود

بيها، بيقول احنا دلوقتي النوافل مبقاش
اختياري مبقاش الواحد بيعمل نوافل عشان
يزيد أنت بتعمل نوافل عشان تلحق الواقع
فبتعمل عشان تجبر الفرد الضايع أنت بتعمل
نوافل عشان تفضل واقف حضرتك مش
عشان تزود، أنت لو فضلت واقف على
الفرض بس في الزمن اللي احنا فيه ده
موضوع مبقاش سهل، الفرض أصلا وقع
والصلاة مخرومة وأنت عارف والصيام
مخروم، وأنت عارف والحجاب نص نص
وأنت عارفة؛ يبقى أنا لازم أعلي عشان اللي
جاي صعب والضرب بيحي في كل حنة،
واللي شغال على اللي يدوبك اللي هو يقولك
أنا مستحب يا عم ملوش لازمة، يا عم ده
مكروه ايه المشكلة؟ ما ده أول واحد بيقع يبقى

متكلمش معايا لو سمحت لما اجي أقولك
أدعوك لشيء لما أجي أقولك مثلاً بينا ما
تيجي نعلي ما تيجي خمار، ما تيجي نقاب، ما
تيجي نلبس أوسع، متقوليش أصل ده مستحب،
أصل سمعت الشيخ قال مستحب، أصل سمعت
قال فيه خلاف، متفهميش كده، لو فهمتي كده
يبقى الكلام ملوش لازمة! أنتِ مش فاهمة احنا
عايزين إيه، دلوقتي بقولك احنا بنعلي عشا
نثبت عشان نفضل موجودين عشان نتحمس،
عشان ربنا يكرمنا

أنا بصلي السنن عشان الفرض مريض مني
أسف، أنا بروح المسجد أحضر صف أول
عشان أنا خايف لو الصف الأول ده راح مني
أنا خايف إن الفرض يروح مني بعد تلت أيام
بالظبط. تمام؟

أنا بصلي قيام ليل عشان ربنا يكرمني وأصلي
الفجر، أنا بقراً قرآن وبتدبر قرآن عشان ربنا
يكرمني وقلبي ميفسدش، أنا واقف على شعرة
فلازم اخش جوة شوية، فكل ما تخش جوة
شوية كل ما يبقى الضربة لو جاتلك مش
هتوقعك، أنت مينفخش تقف على السور، على
سور البلكونة على سور الصبح وتقول ما أنا
واقف معاكم! الإسلام مربع أنت بقى واقف
على إيه؟ على السور بتاعه طب لو خدت
زقة؟ هتقع، لا خش جوة شوية اعمل نوافل
نوافل نوافل نوافل بحيث إن أنت تبقى في
النص طب جت ضربة هتدقج وهتقع بس
مش هتقع من العمارة؛ لكن أنت واقف على
حرف "وَمِنَ النَّاسِ مَنْ يَعْْبُدُ اللَّهَ عَلَى حَرْفٍ^ط
فَإِنْ أَصَابَهُ خَيْرٌ اطْمَأَنَّ بِهِ^ط وَإِنْ أَصَابَتْهُ فِتْنَةٌ

انْقَلَبَ عَلَى وَجْهِهِ خَسِرَ الدُّنْيَا وَالْآخِرَةَ ۚ ذَٰلِكَ
هُوَ الْخُسْرَانُ الْمُبِينُ " [الحج: 11]

واخذين بالناس خايننا بقى النهاردة نفهم بقى يعني
إيه "لا أبرح حتى أبلغ"

اللي هو بقى المنطلق بتاعنا، نبدأ بقى باللقطة
ديت الأول سيدنا موسى عليه السلام كان سُئِلَ
من أعلم أهل الأرض؟ فقال أنا؟ هو ظن إن
هو أعلم واحد.

أوحى الله تعالى إليه إن في عبدٍ ليه في مجمع
البحرين أعلم منك، طيب يبقى كده سيدنا
موسى رقم كام في العالم؟ فكرت في
الموضوع ده سيدنا موسى رقم اتنين، هو 2
وحش؟ يا ريت ده اتنين ده جميل جدا، يعني
لو أنا نمرة 2 إيه المشكلة؟ معلش أنت طلعت
نمرة 2 على الكاية حاجة تزعلك! طلعتي نمرة

2 على الجمهورية حاجة تزعلك؟ خدتي في
المركز الثاني على العالم حاجة تزعل؟
متزعلش، متزعناش إحنا؛ لكن دي حاجة
تزعل سيدنا موسى عليه السلام؟ ليه يعني؟
ليه؟ ليه أنا أبقي المركز الثاني؟ لا ده أروح له
لوقعدت عشرات السنين في الرحلة دي
هروح عشان أبقي المركز الاول عشان أرجع
للاول تاني لا أبرح حتى أبلغ مجمع البحرين.

ليه أنتِ ترضي تكوني نمرة اتنين في الصلاة؟
ليه أنتِ بترضي تبقي نمرة اتنين ما بين
صاحباتك في الصدقة؟ ليه أنتِ بترضي ببقى
مثلا مستوى تدينك أو مستوى حتى زي ماقلنا
الحجاب مش أحسن واحدة في مجموعتك ليه؟
ليه واحدة تسبقك ليه؟ سيدنا موسى نفسه
حصل موقف خطير أنتم عارفين لما النبي

عليه الصلاة والسلام طلع رحلة المعراج
قابل سيدنا موسى في السماء السادسة، وقابل
سيدنا إبراهيم في السماء السابعة، وبعد كده
طلع كلم ربنا سبحانه وتعالى، لما سيدنا محمد
عدّى سيدنا موسى وهو طالع بس.

في رحلة المعراج بكى موسى عليه السلام،
تخيل لو أنت قاعدة سيدنا موسى قاعد في
السماء السادسة اللي هو مفيش حد فوقيه غير
سيدنا إبراهيم، بس لما شاف النبي _عليه
الصلاة والسلام_ عدّى قدامه بس عدّى كده
طلع.

طبعاً هو عارف إن ده أحسن منه، بس لما
أشوف غير لما اسمع يعني، لما أشوفك وأنت
بتأخذ الجائزة الأولى غير لما أسمع، فلما شافه
كده وهو بيطلع قدامه كده هو ميقدرش يطلع.

قعد بيكي سيدنا موسى، بكى هو إنا لوفى
السماء السادسة هبقى زعلان ليه؟ معلش هو
أنا لوفى السماء السادسة هبقى متضايق؟!
يعني يعني دي حاجة إزاي؟ إزاي يعني؟ بس
دي هم دول يا جماعة ده اللي بنتعلمه هو
الناس دي بتسأل بقى واجب ولا مستحب؟ هو
سيدنا موسى بيتكلم بقى واجب ولا مستحب،
هو بيتكلم أنا السادسة، وبيكي لما شاف النبي
عدّاه بس.

**﴿فقال:- يارب ما ظننت أن ترفع أحدا
بعدي فوقى، يعني لولا مش قادر أستحمل،
مش قادر يستحمل المنظر دوت!﴾**

هو عارف إن سيدنا إبراهيم كان من قبله فكده
كده وخلاص.

هو من ساعة ما أتولد عالم سيدنا ابراهيم
أفضل منه، بس سيدنا محمد جه بعديه،
فبالنسبة له مش قادر لما شاف المنظر تآلم
وقعد يبكي يبكي، هو مش بيحسد سيدنا محمد
وإلا هو نفسه اللي نصحه في موضوع
الصلاة، بس هو زي ما بيقول كده إيه؟
صعبان عليا نفسي، كان نفسي أبقى أنا أحسن
واحد. طب ما انت نمرة ثلاثة في التاريخ! لا
مش كان نفسي أنا نمرة واحد.

أنت قاعد في السما السادسة! لا لا مش كفاية
كان نفسي أبقى في السابعة؛ كان نفسي أطلع
فوق.

يعني حاجة غريبة جدا، ده إحنا بنقول يارب
نخش الجنة وخلص.

أي حاجة، الناس بتتكلم في السماء السادسة،
و لا شايف إن لأ، طب ليه طب هو أنا ليه
يعني؟

طب مافيش يعني! طب ما نفكر شوية، عيب
اللي إحنا فيه ده يا جماعة، والله العظيم عيب
اللي إحنا فيه، ده عيب إحنا منظرنا يعني أنت
منظرك قدام نفسك إزاي؟ وأنت شايف كده
سيدنا موسى بيعمل كده طيب!

لما ربنا يقول للنبي عليه الصلاة والسلام
فاصبر كما صبر إيه؟ كما صبر مين؟ قال له
فاصبر كما صبر مين؟ كما صبر أولو العزم
من الرسل.

ماقالوش اصبر صبر عادي لا لا.

والسورة مكية السورة دي سورة الأحقاف
مكية، يعني كان لسه في بداية الدعوة، يعني
كان لسه النبي عليه الصلاة والسلام بيترقى
في المنازل، خد بالك النبي عليه الصلاة مش
من أول يوم كان يعرف إن هو خير البشر ده
بعد كده أوحى إليه بذلك.

ما كنش يعرف في الأول بعد كده عرف أوحى
إليه إن هو صار خير البشر لكن كان في
الأول كان بيتأمر من الله، إن أنت عليّ عليّ،
اجتهد شد حيلك، ما قالوش اصبر صبر
عادي، لا فاصبر كما صبر أولوا العزم من
الرسل.

**﴿مين أولوا العزم من الرسل؟ إبراهيم،
نوح، موسى، عيسى تمام دول أولي العزم
من الرسل.﴾**

فالنبي عليه الصلاة والسلام عمل إياه؟ بقى لما
اتقال له كده؛ عمل إياه؟ بقى راح صبر أكثر
منهم؛ مش صبر صبرهم؛ علا عليهم كلهم،
عدى كله وعلما ربنا قال له كما يعني زيهم،
لا ما عملش زيهم هو صبر صبر أعلى منهم
كلهم، لغاية ما بقى أفضل الناس عليه الصلاة
والسلام.

يبقى أنا كمان ده أنا بقول لك إعمل كذا؛ تقول
لي لا ده أنا عايز أكثر شوية.

سيدنا عبدالله بن عمرو بن العاص يا جماعة
كان النبي عليه الصلاة والسلام بيقول له اختم
القرآن في شهر أنت عارف، بص يا جماعة
الفرق بيننا وبين الصحابة إياه؟ إن أنت
حضرتك بتفاصل بالعكس!

يعني أنا دلوقتي لو قلت لك ما تختتم يا عم
القرآن تقول لي هو أنا لازم أختتم، ما أنا حلو
قوي أحفظ جزئين. يعني تمام ما احفظ البقرة
وآل عمران وخلص!

طب يا ستي ما تفكري في النقاب، طب ما أنا
حلوة بالخمارة! ما الخمار مال له إحنا بقى إيه؟
إحنا دي كارتتنا.

إن أنت بتفاصيل في النزول، بتفاصيل في
النزول، كان الصحابة بيفاصيلوا في العالي،
بقي يعني يعلي فالنبي عليه الصلاة والسلام
يقول له يا عبد الله اختتم القرآن في الشهر،
يقول إني أطيق أكثر من ذلك.

اختتمه في عشرين يوما؛ يقول إني أطيق أكثر
من ذلك.

يقول له اختمه في أسبوعين؛ يقول له لا أنا
أطيق أكثر من ذلك.

فبيختمه في أسبوع؛ أطيقه أكثر من ذلك. طيب
اختمه في ثلاث أيام يقول له لا إني أطيق
أكثر من ذلك.

يقول مافيش أكثر من كده، عايز إيه! هو ما
فيش أكثر من تلت أيام أصلاً.

ما ينفعش تختمه دي في أقل من كده، كده
خلاص، مش هتركز مش هتستوعبه. تمام!
عشان لو أنت بتفاصل في إيه؟

أنتم فاهمين كان النبي عليه الصلاة والسلام
يقول لعبدالله بن عمرو بن العاص صوم ثلاث
أيام من كل شهر؛ يقول له لا ما ينفعش معي

مش مستوايا؛ ده أنا عايز أكثر من كده؛ إيه
تلات أيام في الشهر.. لا لا لا ..

مش مستوايا خالص! يقول له طب صم من
الحُرْم واترك.

ماشي؟ فعايز أكثر من كده؛ يقول له طب صم
يعني اتنين وخميس ماشي؟ لا ما عايزينك
معلش زود شوية زود لي شوية؛ زود لي؛
زود لي؛ يقول له طب صوم يوم وافطر يوم؛
ماشي؟

زود لي؛ زود لك إيه؟ ازود لك إيه أكثر من
كده؟ يقول له خلاص ده صيام سيدنا داود
مافيش أكثر من كده.

فمتخيلين الناس بتفاصيل في إيه؟ بيفاصيل مع
النبي في الزيادة؛ مش بيفاصيل يعني النبي
يقول له خفف؛ وهو يقول له لا زود.

يعني الناس معلية، أنتم فاهمين الفكرة؟ يا
جماعة فاهمين يعني إيه الصحابة كانوا
بيبهروا النبي عليه الصلاة والسلام بأدائهم؟

يعني أقول لكم مثال عشان برضو حنة الإيه
اللي هم ماسكين في حنة إيه؟ واجب ولا
مستحب.

دول بص أصل أنت لو أنت من دماغك واجب
ولا مستحب عمرك ما هتبقى حاجة!

لإن السلف ما كانواش بيفرقوا بين الواجب و
المستحب في العمل؛ أنا هعمله كله، مسألة.

واجب ولا مستحب دي مسألة علمية، يعني إيه
علمية؟

يعني بعرفها بتعلمها بحيث يعني لو
اضطريت أو لو الظروف ماسمحتش إن أنا إيه
أزود؛ إن أنا مثلاً أعمل حاجة معينة هبقى
عارف إن ده حرام؛ ولا مثلاً خلاص يعني
هيبقى مجرد

سبت مستحب وخلاص، يعني ما عملتش إثم.
يعني مسألة علمية، لكن عملياً أنا بعمل كله،
عملياً أنا بعمل كله وبعمل كله وأنا مبسوط،
وسعيد؛ ومش حاسس إن ده تشدد، وده هيخلينا
نتكلم في التشدد كمان شوية.

بس خليني أقول لكم بس الصحابة في موقف
عجيب، كانوا مرة واقفين مع النبي عليه
الصلاة والسلام تمام؟

فالنبي عليه الصلاة والسلام بيصلي بهم حلو
الكلام؟ بصلوا عادي..

فراح النبي عليه الصلاة والسلام عمل حاجة
غريبة، إن كانوا بيصلوا زمان بالنعال، كانوا
بيصلوا بالإيه بالنعال حلو؟

فالنبي عليه الصلاة والسلام وهو بيصلي بهم
راح قلع النعل.. قلع إيه؟ قلع النعل بتاعه
وحطه على جنب.

بس عادي الصحابة وهم بيصلوا بقى وهم جوة
الصلاة راحوا قلعوا النعال وحطوها على
جنب، لأن كان المسجد تراب فكانوا بيصلوا
بالنعال عادي، يعني فالنبي عليه الصلاة
والسلام هو نفسه طالع من الصلاة بيقول لهم
أنتم بتعملوا كده ليه؟ هو أنتم عملتم كده ليه؟
معلش أنتم ليه خلعتم النعال؟

■ سؤال لماذا خلعتم نعالكم؟

فقالوا الكلمة المبهرة الكلمة الرهيبة الكلمة اللي عايزك تحفظها زي اسمك الكلمة اللي عايزك تحفظها زي اسمك قالوا يا رسول الله رأيناك خلعت فخلعنا بس ﴿٤﴾ رأيناك إيه خلعت فخلعنا بس يعني إيه يعني هو أنت بتعمل حاجة غلط معلش هو إحنا لو عملنا زيك هل هيبقى غلط بغض النظر بقى نفهم بعدين بس اللي يقلدك غلط أكيد ما بيعملش حاجة غلط هو أكيد إحنا ما بنعملش حاجة غلط.

إيه بقى اللي حصل وإيه حكمه مش مشكلة يعني إحنا نفهمه بعدين

بس أكيد اللي بيمشي وراك ما بيغلطش وما بيندمش

فهي دي بقى إيه ده المذهب اللي عايزك تعيش
به المذهب اللي عايزك تعيش به ما ما تعيش
أنا بعمل الواجبات ومش هعمل مستحبات
عيش بمذهب رأيـناك صلوا كما رأيتموني
أصلي عيشي بمذهب أمهات المؤمنين رأيـناك
رأيـناك يا عائشة رأيـناك يا خديجة رأيـناك يا
حفصة شوفوا هما بيعملوا واعملوا زيهم
وخلص تفاصيل التفاصيل بقى واجب
ومستحب ديه تفاصيل علمية بنذاكرها بنقرأها
في كتب الفقه أما الإقتداء أنا بعمل كله أنا
بعمل كله وبعلي وبجيب بحاول أبقي زيهم إيه
المشكلة أبقي زيهم إحنا ليه بنبص إن الصحابة
دول خلاص ده خيال علمي وعمرنا ما ينفعش
أبدا نقرب من المستوى ده ليه يعني ليه حالة
اليأس ديه

تمام رأيك خلعت فخلعنا بكل بساطة ومهم إن
الموضوع طلع في الآخر لا واجب ولا
مستحب ولا أي حاجة هو بيقول أنا كنت
بصلي فالنعل اللي أنا لابس فيه نجاسة ما
كنتش أعرف فجاء لي جبريل وأنا في الصلاة
عشان يعني ما ينفعش إن أنا أبقي يعني
بحماية لي فراح قال لي على فكرة النعل
بتاعك في نجاسة اخلعه فخلعته وحطيته على
جنب يعني طلع الموضوع لا واجب ولا
مستحب ولا أي حاجة طلع مالوش علاقة
بالتدين أصلاً ده مسألة حاجة خاصة بيه هو
نعله كان في مشكلة قالها وخلص بس أنت
متخيل الانبهار عامل إزاي أنت متخيل
الاقتداء وصل لإيه؟ اللي هو إحنا هنعمل كده
وخلص.

ما فيش بقى إيه عارف إحنا بقى لو في شبه
الصحابة كنا قلنا طب بعد الصلاة بقى إن شاء
الله نسأله ماشي طب إيه هو واجب ولا
مستحب طب خلع النعل ده واجب ولا مستحب
طب وقع واجب مستحب لا خلاص مش
هنعمله واجب واجب اوي يعني في بقى بتوع
الواجب اوي دول مش ما حدش فاهمهم دول
واجب اوي يعني يعني لو ما عملتوش حرام
اوي يعني يعني هخش النار يعني ولا أعمل
إيه يعني فاهمين إزاي عارفين اللي هو بيسأله
إيه هو الحجاب فرض فرض يعني الحجاب ده
فرض اوي يعني جنة ونار يعني ولا إيه يعني
لازم يعني ما عادي يعني شوية شعر يعني
ممتاز لأ كنا كان في منا اللي هيعمل كده والله

إحنا كنا هنغلب النبي عليه الصلاة والسلام لو
إحنا كنا معاه

يعني الحمد لله إن كان معاه الصحابة تمام كان
هتبقى مشكلة كبيرة جدًا لو إحنا اللي كنا بنشيل
هم الدين ده، ده إحنا شايلين هم نفسنا بالعافية
تمام وكنا بعد كده فاصل بقى طب في قولين
في المسألة طب أنا سمعت الشيخ في شيخ
دحدحاني في التليفزيون بيجي و اللي هو بتاع
حلال حلال ده ده بتاع كله ده حلو ده ده
سمعتة بيقول مافيهاش حاجة بس في شيخ
بقى كان بيجي مع عمرو أديب كده قال
الحجاب مش فرض أصلاً أنتم شيوخ على
فكرة مش فاهمين الدين

هو أصلاً الحجاب مش فرض أنتم اشتغلونا
كل 14 قرن كل علماء المسلمين والصحابة

والتابعين وكل علماء الإسلام طلّعوا غلط
وطلّع بقى سعد الدين الهلالي هو اللي صح
لأن هو قال لنا أصلًا الحجاب مش فرض إيه
اللي أنت بتقوله النقاب اللي حضرتك تكلمنا
عليه ده الحجاب نفسه مش فرض شفت بقى ده
بقى الهواء بقى إزاي إحنا عايزيننا نضيع كده
فاهم فاللي عايز أقوله إن إحنا عايزين نشتغل
بمذهب إيه يا جماعة بمذهب إيه بمذهب
رأيناك بس بكل بساطة جدًا هو النبي عمل إيه

عمل كده يلا بينا كلنا هنعمل زيه كلنا هنعمل
خلاص وده وده رأيناك خلعت فخلعنا بكل
بساطة بكل أريحية بكل هدوء عارفين اه حنة
التشدد دي في بعض مثلًا لما جيت أنت تتك
كده يقول لك اه شيخ بلاش تشدد حلو حلو إنك
فتحت لي الموضوع ده تمام إيه التشدد معلش

إيه هو التشدد إيه هو التشدد تشدد هو الخروج
عن هدي النبي عليه الصلاة والسلام الخروج
عن هدي النبي عليه الصلاة والسلام أما يكون
بالزيادة أو بالنقصان إذا كان بالزيادة تشدد
وإذا كان بالنقصان فهو تفريط إذا التشدد هو
الزيادة على ما كان عليه النبي عليه الصلاة
والسلام زي ما لما سمع الناس قالوا أصوم ولا
أفطر أقوم ولا أنام ولا أتزوج النساء قال لهم
لا ده تشدد بقى ده كده تشدد لكن لو واحد قام
نصف الليل ده تشدد دي الوسطية حضرتك
دي دي الوسطية عشان النبي كان كده [إن
ربك يعلم أنك تقوم أدنى من ثلثي الليل] هو أنا
أسف لو واحدة فيكم لبست نقاب غطى كل
جسمها ده تشدد لا مش تشدد ده عادي كان
زوجات النبي عليه الصلاة والسلام لابسين

كده و الصحابيات كانوا لابسين كده ودل على
كده أدلة كتير منها عائشة رضي الله عنها في
حادثة الإفك في حادثة الإفك لما جه صفوان
كانت هي في الصحراء لوحدها والجيش مشي
فجه صفوان متأخر عن الجيش فهي كانت
نايمة فكانت كاشفة وشها عشان كانت نائمة
وما فيش حد قال فرآني فعرفني وكان قد رآني
قبل الحجاب وكان قد رآني قبل الإيه الحجاب
اللي هو الإيه اللي هو النقاب يعني قال فلما
رآني قال إنا لله وإنا إليه راجعون فقامت على
صوته فلما رأيته خمرت وجهي بجلبابي
خمرت وجهي بجلبابي يبقى قالت أنا قمت
فزعة ورحت مغطية وشي على طول فهو هو
شافها غصب عنه يعني هي كانت فعرفها هو
عارفها قبل الحجاب فعرف إن السيدة عائشة

فقالتم قمت فغطيت وجهي بجلبابي لذلك ده
دليل واحد إن السيدة عائشة كانت إيه كانت
منتقبة تمام الدليل الثاني لما النبي عليه الصلاة
والسلام كان واقف مع السيدة صفية صفية
بنت حيي بنت أخطب يا جماعة صفية صفية
اللي كانت يهودية وأسلمت شوف النقلة اللي
انتقلتها صفية بالإسلام إحنا مولودين مسلمين
يا جماعة دي طلعت من بيت صعب جدًا
شوف شوف وصلت لإيه صفية رضي الله
عنها وأرضاها كان واقف معها النبي عليه
الصلاة والسلام واقف معها بيكلمها في كان
واقف في الطريق كده تمام فمر الصحابة جنبه
فجريوا كده يعني لما شافوه جريوا فقال على
رسلكم مالك بتجري ليه هو أنا واقف بعمل
حاجة غلط على رسلكم إنها صفية إنها إيه

صفية طب ليه بيقول لهم إنها صفية هم مش
شايفينها لا مش شايفنها مش شايفينها ليه
عشان لابسة نقاب هو ما يعرفوش من ديه
ففاكرين النبي عليه الصلاة والسلام واقف معه
واحده غريبة فمش عايزين يعني يزعجوه
فمشيوا بسرعة قال لهم فدي مراتي أنت مالك
أنت ليه كده يعني على رسلكما إنها إيه صفية
فهما مش عارفين دي صفية لإن هي لابسة
نقاب الموضوع بسيط جدًا تمام والسيدة عائشة
قالت رحم الله نساء الأنصار لما نزلت آيات
الحجاب خرجن إلى الفجر خرجن إلى صلاة
الفجر شققن مروطهن وتلفعن بها وخرجن إلى
الفجر لا يعرفن من الغلس يعني لو واحد شاف
مراته في الشارع مش هيعرفها فإذا زوجات
النبي عليه الصلاة والسلام كنّ منتقبات أنا

برضوا مش هتكلم مش هتكلم معاك برضو
عشان ماتقوليش ما انت مش هقول لك واجب
ولا انتم بتحبوا السؤال ده دائماً النقاب واجب
ولا مستحب أنا عايز أطلع من الحتة دي
معلش طلعتني من الحتة ديت أنا النهاردة جاي
ادعوكي إلى علو الهمة أنا جاي النهاردة أقول
لك لا أبرح حتى أبلغ أنا جاي النهاردة أقول
لك مانعلي أنا برودو مش بتكلم النهاردة في
النقاب بس بس أنا عشان حملة البسيه صح ده
الموضوع القريب بالنسبة لي تمام فالنهاردة
جاي أقول لك خد

كله ليه مبنعلاش؟ ليه؟ ليه منجيبش الآخر
يعني؟ ها؟ والله لو واجب يبقى عملنا الواجب.
لو مستحب هنخسر إيه؟ تمام؟ يبقى إحنا

اخذنا أجر زيادة صح؟ وحمينا نفسنا. والواقع مرير والفتن شديدة تمام؟

طيب يبقى انا دلوقتي بتكلم في ايه؟ بتكلم في
انهي مستوى؟ في المستوى دا نساء النبي
كانوا عاملين إزاي؟ طب ما تعملي زيهم
خلاص بكل بساطة أنا بعمل زيهم محدش
شايفني فقهيا بقى ...

■ أنا بعمل زيهم رأيك فعلت ففعلنا تمام؟

طب تعالى أقولك بقى تعال اقولكم الدنيا كانت
ماشية إزاي اصلاً

واحدة من السلف كانت كبرت في السن حتى
فقالوا لها خلاص إن الله وضع عنك الحجاب
النقاب يعني خلاص مش لازم النقاب ربنا قال
(والقواعد من النساء التي لا يرجون نكاحاً

فليس عليهن جناح ان يضعن ثيابهن غير متبرجات بزينة).

﴿فَقَالَتْ وَاللّٰهُ لَا اخْلَعُهُ وَاللّٰهُ لَا اخْلَعُهُ﴾ قالها

طب ليه ما ربنا خفف عنك؟ قالت اقرأوا باقي الآية (وان يستعففن خير لهن) قالت أنا اخترت العالي بقى

بص كانوا بيختاروا الأعلى هو دلوقتي في رخصة لها أن هي تضع اللي تضع النقاب وفي الفضيلة ان هي تفضل محافظة عليها. قالت هو أنا ليه طب ما في العالي

طب ما تكملوا الآية أنتم ليه دائماً أول ما تلاقي فرصة يلا. طب ما تاخذ بالعالي. (وأن يستعففن خير لهن والله سميع عليم) يبقى أنا أصلاً هنا في مسألة النقاب دي استعفاف

مسألة يستعففن مسألة بنعلي

يا عم حتى لو مش فرض طب ما أنا ببقى
بعلى ولو فرض يبقى ديه حاجة مهمة. تمام؟
بصوا بقى الناس اللي بتعلي أبو مسلم
الخولاني أبو مسلم الخولاني تابعي

جه أبو مسلم الخولاني كان بيقوم الليل وكان
بيطيل في القيام بصوا بقى الناس بتفكر في
إيه؟ فكان أبو لمسلم الخولاني يقول إذا فطر
عن قيام الليل كان يقعد دي كان معه حاجة كده
بيضرب بها نفسه. يؤدب نفسه يعني ويضرب
رجليه و يقول قومي يا موطن كل سوء. قومي
يا موطن كل سوء أychسب أصحاب محمد أن
يسبقونا إليه والله لنزاحمهم على الحوض حتى
يعلموا أنهم خلفوا ورائهم رجالاً ، إيه ده أنت

بتتكلم في ايه؟ أنت بتتكلم عايز تقف مع
الصحابة على الحوض؟ اه.

متخيل إن أنت هتقف جنب صحابي على
الحوض؟ طب هقف هنا اقف جنبه ايه
المشكلة؟ هقاوح، هحارب، ايه يعني أتعب
شوية.

لا ده الراجل بيتكلم بجد مش بيهزر، بيقول ليه
يعني؟ وأنا ليه مابقاش جنبهم يعني؟ ما هي قيام
الليل؟ هقوم الليل.

■ صيام النهار هصوم النهار.

■ حفظ القرآن هحفظ قرآن

■ التقوى هعمل التقوى

يعني إيه بقى هوصل تمام؟ أنت بتتكلم في إيه؟
اه بيتكلم في كده.

إيه الهمّة ديه يا عم؟ ده إحنا بنقول يا رب
استرها معانا لا الناس ديه بتتكلم في كده. طب
أنت ليه يعني اللي هو يارب أصلي ركعتين،
ناس كانت بتقوم الليل حتى تتفطر الأقدام.

■ أبو أمامة صحابي جليل راح للنبي عليه
الصلاة والسلام مرة قاله يا رسول الله دلني
على عمل لا عدل له بص أصلاً السؤال عامل
إزاي؟ يعني ليس له مثيل في الاسلام أنت
بص السؤال أصلاً عامل إزاي؟

تعالى دلوقتي واحدة تسألك السؤال العكس بقى
تلاقي يا شيخ هو ينفع أحط ميك اب تحت
النقاب؟ شيخ ينفع أقلع النقاب في يوم فرحي؟

الأسئلة كده إحنا دي أسألتنا للأسف، طب ينفع
معلش أصل يوم فرحي ينفع أحط ميك اب؟

طب معلش أصل فرح صاحبتني هلبس اليوم ده
بس هلبس ضيق وألوان وترتر وبتاع يعني
تمشي يعني؟

ديه الاسئلة طب فيه النقاب اللي هو عامل كده
والحجاب اللي عامل كده....

■ **إحنا إيه قاعدين بنحوم حول الحمى مش**

عايزين نسلك أنتم فاهمين؟

مفيش حد سالك في الدين؟ برضوا حتى اللي
عايز مش سالك

أنتم عارفين انتو عاملين زي إيه يا بنات؟
عاملين زي اللي ترك المعصية وما زال يلتفت

إليها بص أنا بعمل إيه دلوقتي؟ شايفين أنا
بعمل إيه؟ كده يلتفت إليها شوقًا إليها.

وديه مش توبة صادقة كاملة، توبة ناقصة.
الالتفات إلى الذنب، اللي هو سابت الميك اب
والبنطلون والدنيا ديه وكل شوية تحن. وكل
شوية عايزة تفاصيل وأنتم فاهمين أنا بتكلم في
إيه؟ تفاصيل معاك في الأسئلة وتتك عليك في
السؤال.

وكانها عايزة تقول أنا عايزة البس الحجاب
الشرعى بس يدي نفس تأثير التبرج اللي أنا
كنت فيه من الآخر.

ده اللي بنعاني منه، وده اللي بشوفه في
الأسئلة. أنت عايزة إيه؟ أنت ليه بتلتفتي للذنب
كده؟ صعبان عليك أوي المعصية اللي طلعت
منها ده المفروض تطلعى منها فرحانة أنا

عايزة البس حجاب شرعي بصي الحجاب
الشرعي صفته جميلة أوي، حجاب شرعي
يرضي ربنا

وفي نفس الوقت يعمل نفس التأثير بتاع
التبرج.

أفضل جميلة وأمورة وكلهم يقولوا عليّ حلوة،
وأبقى أمورة واتعاكس.

أنتم عايزين إيه يا جماعة واروح الفرحة ابقى
اقلعه واتزين ويبقى هو نفسه زينة في نفسه

هو في إيه؟ في إيه؟ إحنا ليه قاعدين نعمل
كده؟ عارف عاملين زي إيه؟

أنا آسف بقی زي البنات والشباب بقی اللي
طالعة من الاغاني

خلاص تبت من الاغاني أنا طالعة هي من
البي تي اس، طالعة من عمرو دياب. طالعة
من فرق اجنبي. طالعة من أغاني عربي.
ودخلت التزمت، وأخت وبتحفظ قرآن راحت
تسمع حمزة نمرة إيه الفرق معلش؟ هو حمزة
نمرة عشان هو مثلاً بعض أغانيه فيها بعض
الكلمات المحترمة أو لفترة ما كان بعض
الجماعات بتشغله كده ولا مثلاً بتتني عليه بقي
إسلامي بيقول كلمات حب عادي جداً في
الأغاني موسيقى عادي جداً في الأغاني
وجيتار وبنات متبرجة في الكليبات وكلام حب
وكلام مخالف للعقيدة وموسيقى وجيتار وأمور
إيه الفرق بينه وبين حماقي؟ عملنا إيه؟ إحنا
ليه قاعدين نحوم حوالين الذنب؟ ليه؟ ليه
بنحوم حواليه؟ ليه مش سالكين؟ ليه مش

سالكين؟ ليه قاعدين أنا سبت الأغاني بسمع
حمزة نمرة، أنا سبت التبرج بس لابسة حجاب
ضيق شوية وهو زينة في نفسه ومبينة نص
وشي ليه قاعدين نحوم حول الحمى؟ اللي
بيحوم حول الحمى يحصل إيه؟ زي في
الحديث

يوشك أن يرتع فيه يعني إيه يوشك أن
يرتع فيه؟ يعني هترجي تاني.

ما هو اللي بيحوم ده هيرجع تاني. ما هو
السؤال ده لما يجي لي السؤال من واحدة تقول
لك أنا عايزة أطلع نقابي في الفرح وعايزة أطلع
الحجاب الشرعي ده عشان شكلي هيبقى وحش
بيه في خطوبة أختي وأنا بسمع حمزة نمرة إيه
رأيك؟ ده واحد أصلاً مدخلش.

ما هو قاعد يحوم عشان كده قاعد يلتفت للذنب
ويتشوق له. ونفسه يرجع له ثاني. نفسه يرجع
له ثاني تمام؟ خلصت بطلت كلام مع شباب
في الجامعة والكلام في الشمال وهو بطل
صحبة بنات راح حشر نفسه في جمعية فيها
بنات جمعية اسمها جمعية خيرية.

فيها بنات بالهبل وحشر نفسه في العمل اللي
فيه بنات اللي هو الملابس اللي هو الاكل
والشرب اللي هو الشنط معروف ده فيه بنات
كله بنات واسمي في جمعية خيرية بنعمل عمل
إسلامي وفي الآخر آسف نصاحب البنات اللي
في الجمعية.

بس اسمنا في جمعية شرعية عملنا إيه؟ ليه
قاعدين نحوم؟ ليه بنحوم؟ ها؟ ليه بتحومي؟ هو
عشان الشاب ده معاكى خلاص بقى عادي.

نتكلم طول النهار واتساب بالليل ونهزر مع
بعض هو عشان مش في الجامعة هو في
الجامعة حرام وفي الجمعية حلال؟ عشان بس
إحنا مشتركين في عمل ظاهره الخير. ليه
بنحوم حوالين الحمى؟ ليه؟ ليه؟ ليه الحجاب
كده بنحوم حواليه

ليه التبرج بنحوم حواليه؟ ليه الموسيقى
بنحوم حواليه؟ ليه الإختلاط بنحوم حواليه؟
ليه الصحوية بنحوم حواليه؟ هترجعي،
هترجع.

عشان كده الصحابة رجعتي بقى لأبو أمامة
بقى أنا آسف.

✈ **معلش أنا كلامي بيوجع** ❤ حد زعلان

إن أنا بتكلم كلام بيوجع؟ ها حد زعلان؟ لو
زعلان مش صعبان عليّ بجد أنا بخاف عليك.

يا جماعة أنا عندي أربعين سنة يعني شوفت
كتير أنا آسف يعني أنا شوفت الأسود
والأبيض يعني أنا مش طول حياتي كنت كده،
شوفت كده وشوفت كده.

التزمت في الكلية، زي ما أغلبكم التزم في
الكلية.

ففاهم ديه وفاهم ديه مش بتفاخر بالمعصية بل
ندمان.

بس بقولك أنا جاي لك من المستقبل بقى.
شوفت كل حاجه وجايلك بقولك اللي بيحوم
حوالين الحمى ده هيرجعك تاني. وكل من

حامى حول الحمى رجع. عشان كده بقولك
نعلي مع بعض اسمعني

وأنا جاي اهو أنا عارف الناس اللي ثبتت ثبتت
إزاي؟ مثبتش غير اللي بيعلي. مثبتش غير
اللي بيعلي وغير اللي بيطلب المعالي الأمور

ده اللي لغاية دلوقتي واقف، واللي قاعد يحوم
كده اللي آسف، اللي مش سالك ده اللي بيزوغ
ده، مش سالك، ده بيقع.

والله أنا عشان بحبكم بقول لكم الكلام دا. أنتم
مش عاجبكم كلامي قولوا لي اقفل اللايك
متكاش علينا أحمد ربنا إن إحنا مسلمين
خلاص قولولي بقى اروح اكلم ناس تانية بس
أنا أمين، أنا مؤتمن أنا مباخدش منك فلوس
عشان أقولك الكلام دا، ولا بستفيد منك بحاجة،
ديه أمانة بيني وبين ربنا بقولها لك وأجري

على الله أنت عايز تاخد نصيحتي خدها مش
عايز تاخدها متخدهاش.

بس أنا أجيبلك من الآخر. مش هتلاقي داعية
يقولك الكلمتين اللي أنا بقولهم لك دول. لأن
أغلب الدعاة زي ما بدأنا اللايف ده وقلنا
بيططب عليك. فأنتِ فاكرة إن أنا من كتر
الطبابة انتِ معلش أنا آسف بتحومي، وشايفة
إن أصلا ما أنا كده كويسة. ده هو أصلا كل
الدعاة بيقلولوا لي يا ريت بس ، ادخلوا بس ما
تقربي بس. وأنتِ أصلا مقربة. بس أنتِ
بتحومي. ففاكرة نفسك كويسة. لا أنا جاي بقي
أقولك تعالي بقي خدي مستوى ثاني أنتِ مش
كويسة لسه. فيه أحسن. اه

أبو إمامة بقى احنا سبنا أبو إمامة ايه اللي جانبنا هنا ؟

أبو إمامة بيقول للنبي عليه الصلاة والسلام (يا رسول الله دُلّني على عمل لا عدل له) يعني ملوش مثيل جامد. عايز عمل من الآخر. فقال عليك بالصوم. فإنه لا عدل له. عليك بالصوم فإنه لا عدل له. خلاص أبو إمامة خد النصيحة. هي مش مشكلة في السؤال كمان ولا في النصيحة.

طب ما أنتم بتسألوا أسئلة حلوة كتير. وبقول لكم نصايح حلوة كتير. بس مين بيعمل؟ أبو إمامة بقى رَوّح عمل ايه؟ قال فكان أبو إمامة لا يوقد في بيته نار إلا إذا جاءه ضيف. يعني كان أبو إمامة تقريبا بيصوم دائما. يوم ويوم بقى يعني مبيسبش بقى ومواسم وبتاع. لما

بيجي الضيوف بس بيفطر عشانهم. فأنت
بتقولي يا شيخ اعلمي جدول جامد جدا. شيخ
أنا عايزاك بقى تقولي أحلى حاجة في الدين.
وبقول بس مين بيعمل ما دي مشكلة ثانية. ما
أنتم بتتكلّموا كثير يا جماعة. والله الكلام ده
حُجة علينا. أنتم اللي بتتكلّموا كثير. بس أنتم
مبتعملوش في الآخر. ده بقى الفرق بيننا وبين
الصحابة. خليني أقولكم بقى على حدة عشان
بالمرة بقى طالما أنا اتكيت عليكى معلش بقي
أسف بالمرة بقى. صحابي كان النبي عليه
الصلاة والسلام عدى عليه. فكان لابس في
ايده خاتم ذهب.. كان لابس في ايده اي؟ خاتم
ذهب..

فالنبي عليه الصلاة والسلام غضب. غضب
جدا. راجل لابس خاتم ذهب راح مسك الخاتم

من ايده وشاله وراح راميه. غضب الله. شاده
من ايده وراح راميه على الارض. ومشى
النبي عليه الصلاة والسلام. ده كان انكاره
عليه. فالصحابي عمل ايه؟ تفتكروا خد الخاتم
؟؟ لا مشى ، فالناس قالوا له ما تاخذ الخاتم
يا عم ده خاتم ذهب خاتم ذهب! خد اديه
لمراتك اديه لواحدة ست تسيحه وتصدق به
اعمل بيه اي حاجة. قال لهم ايه تفتكروا؟ قالهم
لا والله لا والله

لا أخذه وقد ألقاه رسول الله صل الله عليه وسلم
والله لا أخذه وقد ألقاه رسول الله صل الله عليه
وسلم.

بص بقى حنة اللي أنا بقولها لكم دي الالتفات
إلى الذنب ده كان عايز يأدب نفسه يأدب نفسه
لدرجة إنه أنا مش هاخذ أصلاً حتى لو جائز

إن أنا أخذته مش هاخده عشان أدب نفسي وما
ألتفتش للذنب تاني ، وعشان ممكن لو أخذته
ممكن لو أخذته الشيطان يرجعني ليه ، ممكن
لو أخذته الشيطان يرجعني ليه

أقول لكم بقى أمثلة؟

هتوجعكم ومش مهم أنا آسف و أنتم
هتشكروني إن أنا قولتلكم الكلمتين دول

خد بقى الأمثلة.. ٥١ واحدة بنت لبست الخمار

حلو؟ لبست النقاب حلو؟ هدموم التبرج محتفظة
بيها ليه؟ ليه كل شوية تفتحي الدولاب
وتتفرجي عليهم؟ لو أنا بقوله ده بيحصل
قوليلي ، أنا عارف إنه بيحصل ليه بتتفرجي
عليهم؟ ليه كل شوية يصعبوا عليك؟ لو أنتِ
سيباهم عشان تلبسهم في البيت معنديش

مشكلة ، تلبسيهم لجوزك معنديش مشكلة ،
تلبسيهم قدام حد بنات معنديش مشكلة ، ما هو
ده اكيد هنسييهم تمام؟ أو هتديهم لواحدة تلبسهم
لجوزها.. لقدام بنات مفيش مشكلة

بس أنا مشكلتي إن أنت محتفظة بيهم كذكرى
جميلة محتفظة بيهم حاجة كده كل ما تشوفها
بيصعب عليك نفسك وبتفتكري حلاوتك
وجمالك وأنت لابساهاهم ليه؟ ليه بتاتفتي للذنب؟
ليه؟

المفروض أنت فرحانة إن ربنا نجاكي من
الموضوع دوت بيحصل ولا بيحصلش ليه؟
ها؟

ليه ؟

خدوا بقى خدوا الجامد ليه رغم إنك توبتي
توبتي من الأغاني صح؟ توبتي من الأغاني
ليه لسه محتفظة بيهم على موبايلك ها؟

ليه الفولدر الفولدر _ لو أنا بتكلم غلط قوليلي
أنا بتكلم غلط _ ليه الفولدر اللي فيه الأغاني
والأفلام ها؟ وصورك القديمة اللي فيها صور
مش مش أحسن حاجة ليه محتفظين بيها لغاية
دلوقتي؟ ليه مش قادرة تمسحيهم؟ ها ليه؟

ليه مش بتسيب الخاتم زي ما سابوا الصحابي؟
ليه سيباهم؟ سيباهم علشان يوم ما أرجع؟ ليه؟

ليه لغاية دلوقتي ممسحتيش أرقام بعض
الشباب من على موبايلك ليه متمسحوش ليه
فلان فلان بعينه ليه رقمه ما اتمسحش من
على موبايلك لغاية دلوقتي؟

ليه معلىش هقول كلمة هتوجعك لو أنا غلط لو
أنا اللي بقوله غلط قوليلي غلط تمام؟

ليه لسه عاملة فولو لفلان؟ ولسه رقمه معاك
ولسه بتتابعي Status بتاعته و story
بتاعته وكل حاجة بينزلها ليه؟

اللي كان بيكلمك وأنتِ قطعت معاه خلاص
وتوبتي من العلاقة ديت ليه بتابع story
بتاعته؟ ، ليه لسه بتابع Status بتاعته؟ ، ليه
بتتبسطي لما يعملك لايك إلى الآن ليه؟

أنا بقول كلام غلط ها؟ طب خدي دي كمان
ليه طلعتي من العلاقة الحرام تمام؟ وأنت
طلعت من العلاقة الحرام.. ليه محتفظ لسه
بالجوابات القديمة؟ ليه محتفظة بالهدايا بتاعته؟
ليه محتفظة بذكريات معينة كانت في هذه

العلاقة الآثمة و حطاها في درج معين وكل
فترة بتتفرجي عليهم!!

أنا لو بقول غلط قولوا لي أنا بقول غلط قولوا
لي يا شيخ علاء أنت أنت أنت مش أنت مابتفهمش
في الواقع ، أنت مابتفهمش ، أنت مش فاهمنا
أنت متعرفناش لا إحنا ما بنعملش كده أنت
ظالم ومفتري..

ليه في الدرج في درج عندك في اوضتك لسه
محتفظة به بذكریات بعض العلاقات مش
قادرة تخلصي من الجواب مش قادرة تخلصي
من الهدية ليه بتفتحي الجواب كل فترة؟

رغم إنك توبتي.. بتقولي توبتي. ليه؟ ها؟ ليه
بتشوفي صور صحباتك في الأفراح وهما
لابسين التبرج وبيصعب عليك نفسك ليه؟
وقاعدة تقولي هو أنا بحجاب وأنا علشان بس

ربنا وخلص بس صعبان عليك نفسك
صعبان عليك نفسك كان نفسك تبقي شبههم
ليه؟ ليه؟ ليه؟

زعلانين؟ زعلانين إن أنا بقول الكلام ده ها؟
متضايقين ؟ مش مشكلة مش مهم

أنتم صعبانين عليا بس أنا لازم أقولكم الكلام
ده محدش هيقوله لكم صح؟

والله لا أخذه وقد ألقاه رسول الله صل الله عليه
وسلم.. سيب الخاتم. امسحي الفولدر. امسحي
الصور. قطعي الهدايا. بطلتي تسبيبي رواسب
علائق ها؟ علائق ترجعك تاني للذنوب وأنتِ
سايباها وكأنك مستتية اليوم اللي ترجعي فيه
للذنوب ، حاجة غريبة أنتِ غريبة بكل الشكل
صراحة سايبية ذيول كثير وكأنك مستتية اليوم

اللي هترجعي فيه للذنوب ، فيه إيه؟ على راحتك على راحتك.

لكن الصحابي كان كده كده لا أبرح حتى أبلغ.
عبدالله بن عمرو بن العاص النبي عليه الصلاة والسلام مرة لمح له بس بعتاب لمح له كده بعتاب لمح له بعتاب بس تخيلوا قاله إيه؟ قاله يا عبدالله لا تكن مثل فلان كان يقوم من الليل فترك قيام الليل يا عبد الله لا تكن مثل فلان.. فترك قيام الليل.. يا عبدالله لا تكن مثل فلان هو مقالوش حاجة كان يقوم من الليل فترك قيام الليل، تلميح بس تخيلوا عبدالله عمل إيه؟

قالوا فكان عبدالله بن عمرو بن العاص من يومها لا يُفرش له بساط مكنش بينام زينا كده كان بيقوم طول الليل علشان بس مجرد عتاب

بسيط جه بتلميحة من النبي عليه الصلاة
والسلام.

ده إحنا قاعدين نضرب نار وأنتم مفيش أعمل
إيه تاني؟

أنا آسف أنا قولت النهاردة كلام أنا مش عارف
أنا قولته إزاي بس إحنا وصلنا لمرحلة إن
التلميح مش نافع والتصريح مش نافع فاضل
أقولك أنت بتعمل إيه جوا اوضتك.

أنا مش بعرف الغيب ومش بضرب وجع بس
أنا عارف الواقع فاهم ليه تضطروني أقول
التفاصيل دي؟

ليه ما بتفهموش لوحدكم؟ ها !

ليه ما بنفهمش لوحدنا؟

ليه لازم الشيخ يروح متكى على كل تفصيلة
بتحصل جوة الأوضة؟

علشان أقوله ياه إيه ده أنت عرفت إزاي؟

طب ما إحنا كل الكلام لما أقولك ما تحومش
حول الحمى، ليه ما فهمتيش ده لوحدك؟

عبدالله بن عمرو فهمها لوحده ده بيقولي صلي
خلاص صلينا ما بيقطعش صلاة طول حياته..
تمام.

كان أحد السلف بيقول،،، أنتم عارفين الصفحة
بتاعتي اللي يفتح صفحة الفيس بتاعتي هو في
شعار كده محطوط عليها من ساعة ما فتحت
عارفينه؟ طب قولوه اللي يعرفه يقوله.

هقولكوا الأثر الثاني على ما أنتوا تفكروا
تفتكروا صفحة الفيس بتاعتي في الشعار

بتاعها من يوم ما فتحتها في سنة ٢٠١٥ لغاية
يومنا هي دي صفحتي هي ده عنوان صفحتي
وهو ده مذهب حياتي مذهب حياتي ده اللي
أنا عايش بيه تمام.

أكتبه بقى اللي يعرفه يكتبه هقولهولكوا لو
اتأخرتوا في الكتابة.

هقولكم أثر ثاني أحد السلف كان بيقول لو أن
الانسان سمع لو أن إنساناً سمع عن شخص
اطوع منه لله في مشرق الأرض في مشرق
الأرض فمات كمداً فمات كمداً لم يكن ذلك
بكثير يعني لو سمع إن في واحد في روسيا
بيعبد ربنا أحسن منه فمات من الزعل على
نفسه بيقول عادي إنه المفروض يموت يعني
لم يكن ذلك بكثير.

صح يا ربحانة برافو عليكِ أحسنتِ يا ريهام
ممتاز يا ياسمين ما شاء الله ما شاء الله متابعين
ايوا هي دي بقى خولة

ربنا يبارك فيك يا رب هناء أشكرك على
إهتمامك شيماء ربنا يبارك فيكم يا رب هي
دي بقى إيه؟ أحمد

إذا استطعت ألا يسبقك إلى الله أحد فافعل إذا
استطعت بس يعني حارب حارب

ليه أنت راضية إنك أنت يعني ها يا دوبك في
الحجاب في الأول بقى ربنا سهل يعني يا
دوبك في الحثة الإيه اللي البعض العلماء
بيقولوا انا كويسة كده ليه؟ ليه في عشرات
الآلاف سابقينك ليه يعني؟ ليه ليه ليه مختمش
لغاية دلوقتي؟ الخاتمين أحسن منك في إيه؟
الخاتمين أحسن منك في إيه؟ ليه؟ ليه؟

يعني إذا استطعت ألا اسبقك إلى الله أحد فافعل
صح؟

احسنت يا مروة ربنا يبارك فيك يا مروة علاء

الحرية الحقيقية أن تعيش عبداً لله ربنا يبارك
فيك يا مروة

هو لا أنتم كلكم شاطرين ما شاء الله فأنا مش
عارف أنا طولت عليكم أنا لازم أوقف من
دلوقتي على فكرة أنا عندي كلام كثير جداً جداً
أنا كنت محضر دا في اللي أنا قولته دوت
بس واضح ان الفضفضة خدت مننا وقت
شوية بس أنا بعتمد الفضفضة دي أنفع لإن
واضح إن الموعظة الصرف دي مش مش
بتوصل لكم إلا لما نقعد نضرب في أمثلة أمثلة
أمثلة أمثلة لغاية ما نجيب قعر قعر المواضيع

اللي عندكم ساعتها بتفهموا بقى أنا بتكلم في
إيه

مش مشكلة أقول كل الأدلة اللي أنا كنت
جاييها النهاردة بس كفاية ان أنتم فهمتم أنا
عايز اقول إيه إيه الرسالة اللي أنا بوصلها
النهاردة؟

اسلك اخترق تعمق عليّ زود ارتقي أعمل
المستحبات أطلب الأفضل و الأعلى والارقي
ما تبصش وراء ما تلتفتش إلى الذنب ما تقفش
على الحروكر ك ، ما تسبيش علائق للذنب ،
ما تسبيش ديون تجيبك تاني أقطع كل ده
وخش جوة في النصّ علشان محدش يعرف
يجيبك تاني علشان محدش يعرف يجيبك تاني
علشان محدش يعرف يسحبك علشان محدش
يعرف يوقعك ها؟ ماتقعديش تحومي حول

الحمى ما تسألش واجب ومستحب أعلمي كل
الدين أعلمي كل الدين علشان الفتن هتأخذ
نص اللي أنتِ هتعمله فيفضل لك ربع.

يعني أنا بعمل بعمل تمانين في المية عشان
الضرب هتجيلي هتأخذ مني عشرين في المية
أبقى ستين لكن لو أنا عامل خمسين والضرب
ياخذ مني عشرين ما أنا هبقى ثلاثين أنا
سقطت أعمل تسعين عشان لو الضربة خدت
خمسة وعشرين أبقى في خمسة وستين.

الضرب جامد وأنتم مستهترين وأنتم طول
النهار في كومنات انتكاسة.. فتور يا شيخ..
في انتكاسة فظيعة طب اعمل لك إيه؟

ما هو أنتِ أصلاً أنتِ واحدة واقفة على
الحروكرك، كل حاجة بتعمل الحد الأدنى منها
وفرحانه إن كل الدعاه بيضطربوا عليها
وبيقولوا لها أنتِ كده امورة وكويسة.

معلش لازم حد يعني يتكى شوية يقول لا في
جمهور كبير وأنا عارف إن أغلب اللي
سامعني دلوقتي منهم لا عايزين أكثر من كده
عايزين أكثر من كده مبقاش كفاية

المستوى اللي إحنا بنتكلم فيه دوت إحنا
عايزين نوصل لمستوى الداء والدواء بقى
مستوى عمق في التدبر المستوى دوت تمام؟
مستوى المسابقة الحقيقية.

الصحابة الفقراء راحوا للنبي عليه الصلاة
والسلام قالوا له للصحابة الأغنياء سابقينا في
الدين سبقوكوا إزاي؟

قال معاهم فلوس بيصلوا زينا وبيصوموا زينا
ومعاهم فلوس بيتصدقوا وبيعملوا عمرة وبتاع
فقال لهم طيب هقول لكم على حاجة لو
عملتوها تسبقوهم

هاا قول

قال لهم تسبحوا ثلاثة وتلاتين بعد كل صلاة
وتحمدوا ثلاثة وتلاتين وتكبروا ثلاثة وتلاتين
فده كده إيه تسبقه إيه؟ تسبقه الناس ديت فراح
هوب هوب هوب عملوا كده بعد كل صلاة
وقالوا إحنا كده سبقناهم، الاغنياء بقى هدوا
هدوا بص سيبك من الفقراء المشكلة في
الأغنياء المشكلة في الأغنياء الأغنياء بقا
راحوا قاعدين بعد الصلاة شايفين الفقراء
بيعملوا حاجة فاللي هو إيه؟ أنت بتعمل إيه يا
أخ؟

مالكش دعوة بتقولوا إيه؟

مش هنقولك لا والله لأنت قايل لا مش هينفع
أقولك هو إيه ده دي بتاعتنا إحنا وقعدوا اغنياء
مش سايبينهم لغاية ما عرفوا بيعملوا إيه.

وبعد ما عرفوا إيه اللي بيتقال راحوا قالوا
زيهم وبقوا كلهم بعد الصلاة كله بيختم الصلاة
زي بعضه.

فراح الفقراء ثاني للنبي عليه الصلاة والسلام
قالوا له مش هينفع الكلام ده الاغنياء عملوا
زينا.

طب احنا كده رجعنا لنقطة الصفر قال لهم بقى
"ذلك فضل الله يؤتيه من يشاء والله ذو الفضل
العظيم"

بصوا الناس بتنافس في ايه يا جماعة؟ الناس
بتنافس في ايه؟ انت اصلا نفسك في فلوس
عشان تروحي دبي.

انت نفسك في فلوس عشان تجيبي ايفون
فورتين بروماكس.

انت نفسك في الفلوس عشان تبدلي في اطقم.

انت بتنافسي على كده بس.

من كتر الريلز اللي بتشوفها حضرتك من كتر
البنات الموديل اللي بتشوفهم من كتر
البلوجرز اللي انت بتشوفهم عايزة مطبخ
كبير بس ده اقصى احلامك عايزة مطبخ كبير
بس، عايزة تجيبي زي اللي بتشويه في
التليفزيون ده.

دي هدفك في الفلوس لان احنا بنحوم حول الحمى.

احنا ملتزمناش صح احنا قاعدين لسه قاعدين
بنتحرش بالباطل نتحرش بيه كده مش عايزين
نحل منه قاعدين نحك كده حاجة مزعجة،
ونتفرج عليه من بعيد.

عارفين احنا بعدنا عن الباطل بس قاعدين
ايه؟ نبص له كده.

يا باطل يا وحش بس احنا ايه؟ الله حلو اوي لا
لا انتم وحشين بس احنا عنينا فيه بقى ما هو
ده انت عشان كده بتقعي.

ربنا قال للنبي عليه الصلاة والسلام "لا تمدن
عينيك الى ما متعنا به ازواجنا منهم زهرة

الحياة الدنيا لفتنهم فيه ورزق ربك خير و
ابقى".

يعني ايه رزق ربي الخير و ابقى؟ انا هقول
لكم بقى الكلمة آخر كلمة بقى عشان انا
زهقت.

لو انت شايقة إن في حد أُعطي عطاء افضل
من الالتزام يبقى انت ملتزمتيش.

لو انت شايقة إن لو حد أُعطي الدنيا وما فيها
يبقى أحسن من اللي أُعطيت حجاب يبقى انت
ملتزمتيش.

لو انت شايقة إن الشهرة بتاعة البلوجر ولبسها
والفولورز بتوعها

وعريبتها اللي بتغيرها. ومطبخها الواسع.
أحسن من صفحة قرآن أنت حفظتها يبقى أنت
ما سمعتيش عن الهداية. لو أنت بتبصي من
بعيد كده للباطل بتقولي له من وراء قلبك يا
باطل يا وحش. أنا مش بحب ده، أنتم أنتم
وحشين عايشين في الحرام وده حرام. وقلبك
هيموت ويعمل زيهم. يبقى على الدنيا السلام.
على الدنيا ايه؟ على الدنيا السلام. لو أنت مش
شايقة أنك أنت الاعلى. مش قصدي أن احنا
نتعوج على الناس. مش قصدي خالص. بس
أنا ما بتكلمش عن أنت أنت كشخص. أنا
قصدي يعني الهداية. لو أنت مش شايقة
الهداية دي أعظم مكسب وأفضل وأعظم
كرامة دوام الاستقامة مفيش حاجة غلط لو
أنت معاكي القرآن ومعك حجاب ومعك التزام

ومعك دعوة ومعك دورات ولسه بتقعدى
تبصى على البنات اللي لابسين واللي بيغيروا
وشايفة أن أنت غلبانة ومحرومة وهما
معاهم... أى التزام هذا؟ يعني مر سليمان عليه
السلام بموكبه تخيلوا موكب سليمان فى الطير
والجن والانس والحيوان والجبال كله بقى...
مر بموكبه مرة على رجل يسبح الله فنزل
سليمان نزل من ايه.. من عرشه كان طبعاً
حاجة أبهة خالص نزل وراح للراجل دوت
فقال يا فلان أن تسبيحة منك خير من ملك
سليمان فأن التسبيحة ستبقى. وأما ملك سليمان
فسيفنى. وبالفعل فنى ملك سليمان. وبقي
التسبيح. لما ربنا أثنى على سليمان يا جماعة.
قال ايه عليه؟ قال ووهبنا لداود سليمان ما
قالش عليه ملك. ما قالش غنى. ما قالش

مشهور. ما قالش قوي. ما قالش ممكن. ما قالش الدنيا. قال كلمتين بالظبط في الثناء عليه " نِعَمَ الْعَبْدُ إِنَّهُ أَوَّابٌ " نعم العبد انه اواب دول ممكن انت يبقوا معك دلوقتي. اللقبين دول ممكن يبقوا معك دلوقتي. نعم العبد. ما فيش حد ممنوع من اللقب دوت يعني كثير العودة الى الله. . هو ده. ده سليمان عند ربنا هو ده سليمان. عبد اواب. فأنا

لو شايف ان انا مش محصل كل الخير اللي ربنا اداه للبشر؟ ما فيش حاجة غلط. حاجة غلط. صح؟ شكرا يا محمد كان أحد من الصحابة في غزوة من الغزوات كان في غنائم كثير فهو من فرحته بالغنائم قال ايه؟ قال "قل بِفَضْلِ اللَّهِ وَبِرَحْمَتِهِ فَبِذَلِكَ فَلْيَفْرَحُوا هُوَ خَيْرٌ مِّمَّا يَجْمَعُونَ يجمعون". حلو الكلام؟ قال

ايه؟ قال "قُلْ بِفَضْلِ اللَّهِ وَبِرَحْمَتِهِ فَبِذَلِكَ
فَلْيَفْرَحُوا هُوَ خَيْرٌ مِّمَّا يَجْمَعُونَ". فعمر رضي
الله عنه سمعه. ما عجبوش الكلام خالص. راح
راح أنكر عليه. قال له ايه اللي أنت بتقوله
دوت؟ قال له ايه اللي أنت بتقوله دوت؟ قال
له. أنت بتتكلم ازاي أنت نزلت الآية غلط. قال
له ازاي؟ قال له فضل الله الإسلام ورحمته
القرآن و أما هذا فهو الذي تجمعون. قال له
فضل الله الاسلام ورحمته القرآن و أما هذا
فهو الذي تجمعون. الآية نزلت بتقول إن
الاسلام والقرآن أفضل من الفلوس أنت جاي
بتقول الآية على الفلوس. أنت مسلم. أنت معك
قرآن. أنت معك حجاب شرعي. أنت معك
هداية. ليه شايفة اللي معه فلوس أحسن منك؟
هو خير مما يجمعون لو احنا فعلا حبينا الدين

وحبيينا الهداية هـنحس بكده. أنا ما خلصتش
نص اللي عايز أقوله برضو ... آآ بس لازم
أخلص بقى كفاية كده أنا تعبتكم قوي أنا اسف
طولت عليكم. بس ما أعرفش أنا أحياناً كده
بحس كده ايه بحس في لحظة كده عايز
افضفض عندي جواباً ايه هم كده عايز أطلعاه
في حد. فمبلاقيش غيركم بقي أنتم بقى يعني
ايه زباين يوم الاثنين فانتهم ليه المصب بتاع
همومي، بس إن شاء الله تكونوا استفدتهم يعني
ما تكونش مجرد هموم محضة بلا انتفاع منكم
يعني. خلاصة يا جماعة زودوا على قد ما
تقدروا مهما زودتوا طول ما أنتم على هدي
النبي عليه الصلاة والسلام انتم مش متشددين
ولا أي حاجة أنتم متوسطين. هو ده الوسطية.
الوسطية هو ما كان عليه رسول الله صلى الله

عليه وسلم. الوسطية هو ما كانت عليه
زوجات النبي عليه الصلاة والسلام. طول ما
أنت في الحنة دي أنت مش متشدة ما
المطلوب نزود عشان نحمي نفسنا. لَا أَبْرَحُ
حَتَّى أَبْلُغَ

**بس جزاكم الله كل خير سبحانه اللهم ربنا
وبحمدك اشهد ان لا اله الا انت استغفرك
واتوب اليك. الحمد لله سامحوني بقى إن أنا
اتكيت عليكم شوية... يارب يعلمكم و يرضى
عنكم... اعتبروني يعني يعني أخوكم و
بنصحكم... فضفضة هو ذا اللاف... جزاكم الله
خيرًا... ربنا يجمعنا و إياكم في جنات النعيم
ربنا يحفظكم من كل سوء و يعلي مراتبكم و
يعلي مراتبكم و يوفقكم لكل خير جزاكم الله
خيرًا على حسن الاستماع... ذاكروا بأة أصول**

الإيمان و ذاكروا كويس عشان قربت
تخلص.. جـ زاكم الله خير را يارب
بشكركم... السلام عليكم ورحمه الله